



PRIMEIRO MINISTRO

**INTERVENSAUN BA PLENÁRIA EXTRAORDINÁRIA
IHA PARLAMENTU NASIONAL KONA BA
APRESIASAUN FOUN DEKRETO PARLAMENTU NASIONAL
Nº20/III - OGE 2016**

**Parlamentu Nasional
8 de Janeiru de 2015**

Sua Eselénsia Sr Prezidenti Parlamentu Nasional,

Suas Eselénsias Srs Vise-Prezidentes Parlamentu Nasional,

Distintus deputadus,

Kolegas membrus do Governu,

Povu Timor-Leste tomak.

Kontinuasaun Tinan Foun Kmanek ida ba ita bo'ot sira hotu.

Ho laran nakraik tebes, maka ohin ami mai iha ne'e, dala ida tan, atu hato'o VI Governu Konstitusionál ninia pontu de vista kona-ba politika ne'ebé sai baze ba planu asaun annual no OJE 2016, liu-liu pontu de vista hirak ne'ebe relasiona ho Sua Eselénsia Sr Prezidente da Republika ninia mensajen, iha 28 Dezembru 2016, ba Parlamentu Nasional, hodi husu atu re-apresia Dekretu Parlamentu Nasional nº20/III – Orsamentu Jeral Estadu ba tinan 2016.

Molok atu hato'o VI Governu Konstitusional ninia perspetiva kona ba aspetu hirak ne'ebé saliente-liu, husi Sua Eselénsia Sr Prezidente Republika ninia mensajen de veto, hau hakarak fo'o hanoin hikas fali ba ita hotu katak, iha kontestu separasaun poderes tuir ita nia Konstituisaun da Republika, Governu maka orgaun soberanu ne'ebé responsável ba kondusaun no ezekusaun politika jerál paiz nian (artigo 103º), depois de hetan aprovasaun iha Parlamentu Nasional (alinea a, nº1, artigo 115º). Ho baze ba mandatu konstitusionál hirak ne'e, Governu hotu-hotu, hahú kedas husi I Governu Konstitusional, define ida-idak ninia linã jeral kondusaun politika pais nian liu-husi ida-idak ninia Programa do Governo, ne'ebé hetan apresiasaun iha Uma Fukun ida ne'e, hafoin Governu ida-idak mos hala'o ezekusaun ba sira ida-idak nia programa, liu husi planu asaun no mos orsamentu anual. Kompetensia atu Govenu prepara planu no prepara OJE, hafoin ezekuta depois de hetan aprovasaun husi Parlamentu Nasional, esplisitamente definidu iha alinea d, nº1, artigo 115º Konstituisaun Republika.

Espesifikamente relasiona ho VI Governu, iha sorin ida, ita hotu sei hanoin hela katak programa Governu hetan apresiasaun no aprovasaun husi Parlamentu Nasional iha fulan Marsu 2015, no programa ida ne'e rasik, sai nu'udar kontinuasaun husi programa V Governu nian (embora fo'o enfaze ba aspetu ne'ebé la hanesan husi V Governu), no programa ida ne'e moos buka atu implementa Planu Estratéjiku Dezenvolvimentu ne'ebé Parlamentu Nasional rasik aprova iha tinan 2011, atu sai nu'udar mata-dalan ba dezenvolvimentu sosio-ekonómiku Timor-Leste nian, hahú husi tinan 2011 to'o 2030. Tuir Planu Estratéjiku Dezenvolvimentu, hahú tinan 2016 to'o 2020, Timor-Leste tama iha Segunda Faze implementasaun, ne'ebé envolve liña de asaun importante tolu: (1) Kontinua dezenvolve infraestrutura, (2) Hametin liu tan Rekursus Umanus; (3) Haburas kompetitividade iha Timor-Leste nia ekonomia.

Iha sorin seluk, liña de asaun tolu ne'ebé trasa tiha ona iha Planu Dezenvolvimentu Estratejiku ba tinan 2016 to'o tinan 2020, ami inkorpora tiha ona iha Programa VI Governu, no buka atu ezekuta liu husi planu asaun no orsamentu anual, inklui mos liu husi OJE 2016 ho focus ba Segunda Faze implementasaun Planu Estratejiku Dezenvolvimentu 2011-2030. Refleksu husi liña de asaun tolu ne'e, maka hamosu prioridade no alokasaun orsamentu ba tinan 2016.

Sr Presidente, ilustres deputadus, povu Timor-Leste tomak.

Haree ba mensajen Sua Eselénsia Sr Prezidente da Repúblika kona-ba veto ba OJE 2016,

Uluk nian nain, VI Governu konsiente katak '*investimentu hirak ne'ebé ita desidi atu halo ohin, labele prejudika fali dezenvovimentu aban-bain-rua nian*'. Maski nune'e, Governu mos hanoin katak dezenvolvimento aban-bain-rua nian, sei la iha, wainhira ita la hahú halo investimentu ohin.

Governu kompriende preokupasaun katak despeza ne'ebé Estadu hala'o la sustentavel, ho razaun katak (1) mina folin tu'un ba beibeik, no projesaun ba tinan 2016, tuir obeservador sira, sei sai 50 dolares amerikanus/barril, enkuantu ke governu ninia presu referensia ba OJE 2016, a'as liu, ho valor 64,70 dolares amerikanus; (2) OJE ultrapassa beibeik Rendimento Sustentável to'o liu tiha 100% no (3) reseita não-petrolifera kleur ona maka sei nafatin ki'ik, no "quase estagnado".

Lo'os duni, mina ninia folin muda ka varia beibeik, maibé ita moos keta haluha katak 90% husi rikeza minarai nian ne'ebé ita hatene, transformadu ona ba rekursus/asset finanseirus, no rekursus finanseirus hirak ne'e, ho baze ba politika investimento ne'ebé Governu hala'o, tinan-tinan hamosu funan ba Fundu Minarai.

Atu haree ba sustentabilidade ita nia utilizasaun Fundu Minarai, ita presiza haree moos, ba redimentu ne'ebé mai husi minarai no gas, tau tan ho osan funan husi investimento Fundu Minarai, hafoin kompara ho montante ne'ebé tinan-tinan ita hasai hodi sustenta OJE. Husi tinan 2005 to'o 2014, osan ne'ebé tama ba Fundu Minarai katak (husi rendimento mina no gas, tau tan ho osan funan husi investimento) bo'ot liu osan ne'ebé hasai ba OJE. Dadus ne'ebé iha hatudu katak ita konsegue poupa liu husi 70 pursentu, wainhira mina nia folin a'as. Tinan 2015, to'o iha fulan Dezembru, hatudu katak osan ne'ebé hasai husi Fundu Minarai hodi finansia OJE bo'ot liu pur volta de 200 milloens husi osan ne'ebé tama ba Fundu Minarai, maibé montante ida ne'e bele muda/varia wainhira Banku Sentral apresenta relatoriu final kona ba rendimento husi investimento Fundu Minarai. Ba tinan 2016, se karik ita uza hanesan baze estimativa US\$50/barril (tuir buat ne'ebé Sua Eselénsia Sr Presidente da Republika sujere), estimativa hatudu katak, Fundu Minarai iha 2016, sei hetan rendimento total US\$ 1,321 mil milloens (US\$453.5 milloens mai husi rendimento mina no gas, no US\$867.7 milloens husi funan investimento Fundu Minarai).

Loos duni ita ultrapassa Rendimento Sustentavel Estimadu, tamba ita presiza rekursus finanseirus adisionais atu investe iha areas ne'ebe linã de orientasaun Planu Estratjiku Dezenvolvimentu define, hanesan temi tiha ona iha leten. Iha sorin ida, Governu hahu kellas tinan 2011 adopta politika "frontloading", katak antesipa halo despeza ba investimentu capital maka'as kellas agora, hodi nune'e, hahu tinan 2020, investimentu iha capital hirak ne'e bele ona hamosu rendimento fiskal suficiente atu hamenus Timor-Leste ninia dependensia ba Fundu Minarai. Atu bele finansia politika 'frontloading' ida ne'e, osan balun ita foti husi Fundu Minarai, no montante seluk ita foti husi osan ne'ebé parseiru sira fo'o empresta mai ita, ho funan ne'ebé ki'ik-liu kompara ho funan ne'ebé ita nia osan iha Fundu Minarai hetan, husi investimentu finanseiru ne'ebé ita halo.

Iha parte seluk, wainhira ita haree dadus kona-ba reseita não-petrolifera, ita bele haree katak reseita ida ne'e, la estagnadu, tamba husi tinan 2011, pur exemplu, to'o 2015, reseita não-petrolifera aumenta husi US\$111.7 milloens, ba US\$170 milloens, ka iha tinan lima nia laran iha aumentu 52.1%. Progresu ida ne'e seidauk másimu, maibé hatudu katak reseita não-petrolifera iha potensialidade bo'ot atu sai nu'udar fonte adisionál ne'ebé signifikativu ba finansiamentu dezenvolvimentu sosio-ekonomiku Timor-Leste nian, wainhira iha duni investimentu ne'ebé sériu iha ita nia ekonomia. Reforma ekonomika no fiskal ne'ebé VI Governu oras ne'e hala'o hela sei buka atu (1) diversifika liu tan tipu impostu não-petrolifero; (2) habelar liu tan baze ka, universu kontribuinte impostus nian; (3) halo administrasaun impostus sai eficiente liu tan.

Sr Presidente, ilustres deputadus, povu Timor-Leste tomak.

Tuir fali, preokupasaun importante ida ne'ebé Sua Eselensia Sr Presidente da Republika manifesta iha mensajen kona-ba veto ba OJE 2016 maka sustentabilidade dezenvolvimentu futuru Timor-Leste nian. Preokupasaun ida ne'e hato'o liu husi silogismu ida, ka modelu rasiōsinio bazeadu ba dedusaun, ho premisa rua ne'ebé lori ba konkluzaun ida. Silogismu kona-ba sustentabilidade dezenvolvimentu futuru Timor-Leste nain, bele haree iha página 3 husi Sua Eselensia Sr Presidente da Republika ninia mensajen. Hau sei lê tuir mai, entre aspas:

"Num OGE em que:

- a) a despesa corrente do Estado corresponde a mais de dois terços da despesa total e em que
- b) cerca de metade (47%) do financiamento global do Orçamento é feito acima do RSE

significa que o mecanismo de levantamentos acima do RSE não se destina a salvaguardar os interesses futuros de Timor-Leste e dos timorenses, mas financiar o funcionamento actual da máquina do Estado."

Ho lian Tetun ita bele hateten hanesan tuir ne'e:

"Iha orsamento ida ne'ebé

- a) Despeza korrente Estadu nian bo'ot liu 75% despeza total orsamentu, hafoin
- b) Besik metade (47%) husi finansiamentu global Orsamentu mai husi montante asima do Rendimento Sustentavel Estimadu,
Hatudu katak mekanizmu foti osan bo'ot liu tiha Rendimento Sustentavel Estimadu la'os atu salvaguarda interese futuru Timor-Leste no Timoroan sira nian, maibe atu finansia funzionamentu atual mákina Estadu nian."

Wainhira ita haree liu deit pensamentu dedutivu ida ne'e, ita bele hanoin katak konkluzaun ne'e lo'os duni, katak proposta OJE 2016 salvaguarda deit makina Estadu, no la salvaguarda interese futuru Timor-Leste no Timoroan sira nian, tamba Governu propoin atu uza 75% husi OJE 2016, hodi sustenta deit makina Estadu.

Maibé, se ita analíza didiak Livru Orsamentu 1 to'o Livru Orsamentu 6, ita sei hare'e katak:

- (1) Despeza Korrente Estadu nian (katak osan ne'ebé aloka iha OJE 2016 hodi bele sustenta makina estadu, hanesan salariu no vensimentu, beins i servisus balun, no capital menor balun, hamutuk hotu) la bo'ot liu 29% husi total OJE ba 2016. Signifika orsamentu em termus meritu atu sustenta makina Estadu ba tinan 2016 ninia montante hamutuk hotu US\$453,862 milloens.
- (2) Despeza Kapital no Transferensia Publika ne'ebé aloka iha OJE hamutuk hotu 71% ka US\$1.108, 371 milloens.
- (3) Rendimento Sustentável Estimadu ba tinan 2016 maka US\$544,8 milloens, no previzaun reseita não-petrolifera ba tinan 2016 maka 171.4 milloens. Sira nain rua hamutuk hotu sai US\$716.2 milloens. Ida ne'e signifika Despeza Korrente Estadu nian la ultrapasa total husi Rendimento Sustentavel Estimadu tau hamutuk ho reseitas não petroliferas.

Ho faktu sira ne'ebé foin temi dadaun ne'e, ita bele hare katak silogismo ka rasiosinio dedutivu iha leten la dun lo'os, ka sai nu'udar buat ne'ebé iha lójika filozófika bolu dehan 'falácia'. Ida ne'e signifika, wainhira ita **la analíza** didi'ak detalles ne'ebé iha Livru 1 to'o Livro 6, preokupasaun kona-ba sustentabilidade dezenvolvimentu futuru Timor-Leste nian ne'ebé espresa iha silogismo iha leten, bele haree hanesan loos, maibe hafoin halo analize detalladu, preokupasaun ida ne'e, bele dehan katak la iha fundamentu.

Sr Presidente, ilustres deputadus, povu Timor-Leste tomak,

Sua Eselénsia Sr Presidente da Republika mos preokupa kona-ba oin-sa ita define prioridade nasional, no oin-sa ita investe ita nia rekursu ne'ebé limitadu, liu-liu tamba tuir persesaun Sua Eselensia Sr Presidente da Republika nian, OJE 2016 (1) aumenta 24% iha infra-estrutura, liu-liu ba ZEESM no ba projetu Tasi Mane, ne'ebé "alegadamente" la hatudu garantia kona-ba retornu; (2) reduz maka'as orsamentu iha area saúde, edukasaun no agrikultura, no (3) iha nesesidade atu halo ekilibriu iha dezenvolvimentu ba area rural sira.

Governu sensibilizadu ho preokupasaun hirak ne'e, maibé hakarak esklarese pontu hirak hanesan tuir mai ne'e:

- (1) Aumentu orsamentu ba infraestrutura hala'o iha kontestu kompromisu ne'ebé Estadu tomak halo ona atu diversifikasi Timor-Leste ninia ekonomia. Se Timor-Leste la kontinua investe iha infra-estrutura, nu'udar meiu ida atu investe iha prosesu investimentu sosio-ekonomiku, oin-sa ita bele diversifikasi ita nia ekonomia, hodi nune'e bele hamenus dependénsia ba Fundu Minarai?
- (2) Hanesan esplika tiha ona iha debate OJE 2016, iha parte generalidade no moos espesialidade, investimentu publiku ninia retornu la'os hanesan ho investimentu privadu. Investimentu hotu-hotu, tantu publiku ka privadu, enfrenta dilema entre risku no retornu, no desizaun ba investimentu normalmente halo ho baze ba ekilibriu di'ak ida entre risku no retornu. Risku ne'ebé ki'ik normalmente asosiadu ho retornu ne'ebé ki'ik, no risku ne'ebé bo'ot asosiadu ho retornu ne'ebé bo'ot. Ditadu popular Portugues ida hateten: "Quem não arrisca não petisca", katak, se mak lakohi foti ka liu husi risku, sei labele petiska, ka sei labele saboreia rezultadu ne'ebé di'ak. Risku iha investimentu publiku maka sa ida? Hau temi deit risku importante tolu: *inefisiensia, esbanjamentu, no korupsaun*. Ita pronto ka la'e atu enfrenta risku hirak ne'e? Planeamentu ne'ebé di'ak hamenus risku inefisiencia, mekanismus de controlu ne'ebé diak, hamenus risku esbanjamentu no korupsaun. Husi sorin retornu nian, retornu bo'ot liu iha investimentu publiku ida maka retornu social, tuir kellas ho retornu ekonomiku no retornu fiskal, no ikus liu maka retornu finanseiru. Maski nune'e, iha investimentu hotu-hotu, publiku ka privadu, susar atu bele fo'o garantia kona-ba kuantidade retornu, liu-liu retornu finanseiru. Bele iha estudu viabilidade ho metodolojia oi-oin, maibe atu garante katak sei fo'o retornu finanseiru ida ne'ebé ezatu, susar tebes.
- (3) Kona-ba ZEESM, estudu viabilidade inisial ne'ebé hala'o molok atu aprova Lei nº3/2014 hateten katak, ba deit konseitu Zona Ekonomia Espesial iha Oecusse-Ambeno (momentu nebá seidauk inklui komponente sosial), durante tinan sanulu resin lima nia laran, sei presiza investimentu ho montante 4 mil milloens dolares amerikanus, ba zona espesial economica ida ho área 170 hektares (iha area Pante Macassar nia laran, inclui Padiai no Tono). Husi montante ida ne'e, estimativa ba investimentu privadu hamutuk hotu 75%, no investimentu publiku 25%, no objetivu husi investimentu publiku ne'e, maka hamosu kondisaun hanesan estrada, eletrisidade, bé-mos, portu, aeroporto no infraestrutura sira seluk hodi bele atrai Investimentu Estrangeiru Diretu. Atividade ekonomika iha 170 hektares nia laran, para alein de retornu social, ekonomiku no fiskal, bele moos hamosu, hahu tinan 2030, **perpetuidade finanseira 20%/anual**, ka iha lia fuan seluk, ativu ne'ebé hamosu husi investimentu 4 mil milloes sei fo'o rendimento fixu serka de US\$800 milloens/anu. Maski nune'e, estudu viabilidade ida ne'e presiza atu atualiza, tampa presiza mos inklui konseitu "economia social de merkadu". Ida ne'e signifika tenki inklui ona territoriu Oecusse-Ambeno (ho area 850 km²). Fulan ida ne'e nia laran, planu ordenamento teritoriu RAEOA nian sei remata, no ho baze ba planu ordenamento ne'e, sei prepara Planu Estratéjiku Dezenvolvimentu ba ZEESM, inklui moos Ataúro hanesan polo dezenvolvimentu komplementar ida. Planu Estratéjiku ne'e maka sei identifika projetus de investimentu ekonomiku espesifikus, no sei halo estudu viabilidade pur projeto. Kona-ba Ataúro, planu ordenamento teritoriu pronto ona, no hahu tinan 2016

investimentu publiku ne'ebé aloka ba Atauro sei konsentra iha infra-estrutura hanesan be-mos, eletrisidade no portu. Wainhira planu ordenamentu territorio hetan aprovasaun husi Konsellu Ministrus, maka planu ordenamentu ne'e sei sai baze atu dezenovolve mos parte husi Planu Estratéjiku Dezenvolvimentu ZEESM, ne'ebé relasiona ho Ataúro, hafoin sei halo estudu viabilidade ba projeto atividade ekonomika ida-idak ne'ebé identifika iha Planu Estratéjiku.

- (4) Relaciona ho projeto Tasi Mane, estimativa ne'ebé Governu anterior sira halo hateten katak investimentu publiku iha tinan 7 oin mai, sei presiza to'o 2 mil milloens dolares amerikanus, espesifikamente ba konstrusaun baze abastesimentu Suai, auto estrada no aeroporto, hodi bele atrai investimentu estranjeiru diretu hamutuk 15 mil milloens dolares amerikanus, hodi bele hari'i fabrika LNG, refinaria, no zona industrial ba industria komplementar seluk. Investimentu hirak ne'e, para alein de retornu social, ekonomiku no fiskal, tuir estimativa, iha potensialidade atu bele lori rendimentu to'o 40 mil milloens dolares amerikanus mai Estadu, liu husi industria estrasaun no prosesamentu mina no gas, hahu tinan rua-nulu oin mai.
- (5) Wainhira ita haree ba Fundu Konsolidadu Timor-Leste deit, loos duni orsamentu tinan 2016 ba saude, edukasaun ho agrikultura, hetan redusaun kompara ho tinan 2015. Maibé, se ita sura mos despeza ba capital ne'ebé aloka iha PDIM (uluk hanaran PDID), Fundu Infraestrutura, no moos Fundu Dezenvolvimentu Kapital Umanu, ita bele haree katak ba Saúde iha montante total US\$65.6 milloens ba tinan 2016 (enkuantu ke iha tinan 2015 aloka 67 milloens iha fundu konsolidadu, maibe ezekuta deit 63 milloens), ba Agrikultura iha montante total 28.1 milloens ba tinan 2016 (enkuantu ke iha 2015 aloka 27 milloens iha fundu konsolidadu, maibe ezekuta deit 26 milloes), no ba edukasaun iha montante total 112 milloens ba tinan 2016 (enkuantu ke iha 2015 aloka 103 milloens iha fundu konsolidadu, maibe ezekuta deit 102 milloens). Husi perspetiva Governu nian, montante ka persentagem deit husi osan ne'ebé ita aloka ba setor hirak ne'e, labele sai sasukat uniku, kona-ba ita fo'o ka la'e prioridade ba setor hirak ne'e. Montante ne'ebé aloka tenki haree moos ba kapasidade atu ezekuta osan ne'ebé aloka, no moos kapasidade atu ezekuta programa ka projeto ho kualidade.
- (6) OJE 2016 aloka 49.8% ka 453.8 milloens dolares iha kategoria despeza kapital no transferencias publikas, ba munisipiu sanulu resin tolu. Embora ida ne'e la garante ekilibriu iha dezenvolvimentu entre zona rural ho urbana, pelu menus faktu ida ne'e bele hatudu moos katak, alokasaun OJE 2016 la konsentradu iha projetus nacionais deit.

Sr Presidente, ilustres deputadus, povu Timor-Leste tomak,

Preokupasaun tuir mai iha Sua Eselénsia Sr Prezidente da Republika ninia mensajen de veto maka estinsaun atual Fundu Infraestruturas nu'udar fundu espesial ida, hodi hamosu fali Fundu Infraestrutura nu'udar fundu autonomu ida, ne'ebé tuir mensajen de veto hateten, fundu ne'e hamosu la tuir kuadru legal ne'ebé define regra ba funzionamentu transparente husi fundu espesial.

Governu kompriende preokupasaun kona ba legalidade no transparensia relasiona ho kriasaun fundu autonomu ba infraestruturas, maibe hakarak hato'o pontu de vista hanesan tuir mai ne'e:

- (1) Fundu infraestrutura ne'ebé Dekretu do Parlamentu Nasional nº20/III, Orsamentu Jeral do Estadu propoin atu kria, **la'os fundu espesial ne'ebé define iha artigu 32º Lei nº13/2009, 21 de Outubru**, maibe fundu autonomo ida ho personalidade juridika, no autonomia administrativa no finanseira.
- (2) Razaun importante kriasaun fundu autonomu hodi troka fundu espesial, maka liu husi fundu autonomo ne'e, tinan-tinan ita la presiza re-apropria montante hirak ne'ebé la konsege ezekuta iha tinan nia rohan. Mekanizmu ida ne'e sei lori benefisiu importante rua: (a) prosesu pagamentu ba projetu infraestrutura, bele nafatin hala'o, maski to'o ona final do ano, no maski orsamentu seidauk aprova no promulga, hanesan situasaun ne'ebé ita enfrenta oras ne'e dadaun. Ida ne'e sei rezolve mos problema likidez empreza nian, ne'ebé dala barak sai kauza ba atrazu implementasaun obra sira iha teritoriu laran tomak; (b) mekanizmu ida ne'e sei loke espasu fiskal, hodi bele aloka orsamentu ba areas sira ne'ebé ita presiza atu investe, maibé tamba tinan-tinan ita tenki re-apropria montante hirak ne'ebé la konsege ezekuta hotu iha tinan ida nia laran, re-apropriasaun ida ne'e 'okupa tiha espasu fiskal' hodi hasai marjen de manobra iha prosesu alokasaun orsamentu ne'ebé tinan-tinan ita halo. Ezemplu konkretu ida: iha tinan 2016, ita aloka 1 miliaun ba konstrusaun no supervizaun irrigasaun ida iha Larisula. Se karik to'o 31 de Dezembru 2016, maka konsege ezekuta deit obra to'o montante 600 mil dolares amerikanus, signifika iha OJE 2017, ita sei la presiza re-apropria fali 400 mil, hodi completa obra ne'e iha tinan 2017, maibe fundu autonomu infraestruturas retein hela ona montante 400 mil dolares amerikanus ne'e, hodi bele completa obra, e bele kontinua selu nafatin fatura ne'ebé mai husi empreza ne'ebé implementa obra, mesmu to'o ona 31 Dezembru, no karik moos OJE 2017 la hahu ezekuta iha Janeiru 2017, hanesan atrazu ne'ebé oras ne'e ita enfrenta hela dadaun.
- (3) Kona-ba legalidade kriasaun fundu autonomu ba infra-estrutura, Governu hanoin katak: (a) Instrumentu legal ne'ebé adekuadu liu, atu hamosu fundu autonomu ida, maka Lei Orsamentu Jeral do Estadu, tamba fundu autonomu ne'e figura finanseira ida ho impaktu orsamental, no lei OJE rasik maka instrumentu lejislativu di'ak liu atu define regras ho impaktu finanseiru no orsamental, hodi respeita mos prinsipi universalidade ka unidade tuir Lei nº13/2009 haruka, iha artigu4º; (b) Proposta kriasaun fundu autonomu ne'e la iha kontradisaun ho Lei nº13/2009 tamba proposta ne'e respeita prinsipi transparensia, no espesifikasiacaun ba reseitas no despesas ne'ebé deskreve momoos lo'os iha finalidade fundu autonomu ne'e nian, no ninia reseita no despeza global hetan deskrisaun iha Aneksu II no Aneksu III, iha parte ne'ebé refere ba "Serviços e fundos autonomos", tuir buat ne'ebé Lei nº13/2009 haruka iha artigu 27º; (c) Proposta kriasaun fundu autonomo ne'e moos asegura sujeisaun ba padraun internasional kontabilidade nian, no mos ba mekanismu inspesaun no kontrolu ezekusaun orsamental husi orgaun soberania sira seluk, tuir Lei nº13/2009 haruka, iha artigu 52º no artigu 53º.

Sr Presidente, ilustres deputadus, povu Timor-Leste tomak,

Hafoin deskreve tiha Governu ninia pozisaun hanesan temi ona iha leten, no ho respeitu tomak ba Sua Eselénsia Sr Presidente da Republica ninia preokupasaun hotu ne'ebé hato'o liu husi mensagem de veto, hodi governu nia naran hakarak hato'o katak **orsamentu ne'ebé Governu propoin ba tinan 2016, orsamentu ida ne'ebé buka aplika ita nia rekursu ne'ebé limitadu ba dezenvolvimentu sustentadu ita nia paiz nian, no ba melloria kondisaun vida ita nia populasaun nian.**

Governu la kontesta nesesidade atu investe liu tan iha Timoroan sira, liu husi edukasaun no saúde nu'udar ferramenta bein estar nian, maibé Governu moos hanoin katak "investe liu tan" la signifika "tau tan deit osan" ne'ebé, iha pratika, instituisaun sira ne'ebé responsável ba planeamentu, jestau no ezekusaun osan, la konsege abosorve no utiliza osan hirak ne'e, iha kontestu ezekusaun ida ho kualidade.

Ikus liu, loos duni katak liu tiha tinan sanulu-resin-tolu hafoin restaurasaun ita nia independensia, ita hotu hamutuk bele halo diak liu tan, no ita bele halo diak liu tan duni, wainhira ita ida-idak tuir dalan ne'ebé Lei Inan define tiha ona.

Fiar a'an la'o ba oin, tamba hamutuk ita bele hari'i NASAUN HUSI BAZE, hodi lori mudansa ba ita nia povu nia moris!!!

Obrigadu wa'in ba ita bo'ot sira hotu ninia atensaun.

Dr Rui Maria de Araújo
8 Janeiru 2016